

全唐文紀事

全唐文紀事卷十八

原任翰林院編修 國史館纂修 實錄館提調 武英殿協修陳鴻墀纂

貶斥

唐代宗既誅元載欲盡誅其黨韓會等闕具奏苦諫止

降遠州會退之兄也退之謂兄罹讒口承命南遷按會

所坐非罹讒者柳子厚亦云韓會善清言名最高以故

多得謗豈士能清高反汚於元載乎

聞見後錄

崔造韓會盧東美張正則爲友以王佐自許時人謂之
四夔是四人者造後獨至相位然論者不滿焉以虛名

之無實也春按造之外韓會者故奸相元載黨也大厯
中坐載貶官以卒其立身如此無可言者而柳子厚謂
其名高致謗殆恐不然彼盧與張直文人之靡耳四夔
之稱抑何以異叔文之黨謂可與興堯舜之道者乎

餘冬

序錄

呂溫贊凌煙功臣其序曰至若張亮侯君集之跋扈敢
沒其名用彰天刑蓋集卽圖象後方以逆誅當其臨決
太宗謂曰今而後惟見公之畫象而已豈當時爲帝有
見象之言遂不敢毀撤耶故呂溫得以議行黜削也

攷古

編

楊元禧傳載武后制曰隋尙書令楊素肯在本朝早荷殊遇稟凶邪之德懷詔佞之才惑亂君上離間骨肉搖動冢嫡甯惟掘蠱之禍誘扇後主卒成請蹕之釁生爲不忠之人死爲不義之鬼身雖幸免于竟族誅斯則姦逆之謀是其庭訓險薄之行遂成門風刑戮雖加枝允仍在豈可復肩隨近侍齒迹朝行朕接統百王恭臨四海上嘉賢佐下惡賊臣常欲從容於萬機之餘褒貶於千載之外況年代未遠耳目所存者乎其楊素及兄弟

子孫並不得令任京官及侍衛史言元禧忤張易之密奏左貶然此制自是當

時公 日知錄

贈閭邱師太常博士均之孫謂鳳藏丹霄暮龍去白水
渾蓋稱均之文也攷之舊史成都閭邱均景龍中爲安
樂公主所薦起家拜太常博士公主誅貶循州司倉進
不以道其文不足觀也已困學紀聞

天寶二年是時海內晏平選人萬計命吏部侍郎宋遙
苗晉卿考之遙與晉卿苟媚朝廷又無廉潔之操取舍
偷濫甚爲當時所醜有張奭者御史中丞倚之子不辨

菽麥假手爲判特升甲科會下第者嘗爲薊令以其事
白於范陽節度使安祿山祿山恩寵崇盛謁請無時因
具奏之帝乃大集登科人御花萼樓親試升第者十無
一二焉爽手持試紙竟日不下一字時謂之曳白帝大
怒遂貶遙爲武當太守晉卿爲安康太守復貶倚爲淮
陽太守詔曰庭闈之間不能訓子選調之際乃以託人
士子皆以爲戲笑或託於詩賦諷刺考判官禮部郎中
裴肫起居舍人張烜監察御史宋昱左拾遺孟朝皆貶

官嶺外

日知錄

貞元十六年九月貶鄭餘慶彬州司馬舊傳曰時歲旱人饑德宗與宰相議將賑給禁衛十軍事未行爲中書吏所洩餘慶貶郴州司馬按實錄餘慶與于頔同貶餘慶制辭云乃乖正直有涉比周棄法弄情公行黨庇頔制辭云姓本纖狡行惟黨附奏對每乖於事實頔邪有蠹於彝章今從之

通鑑
考異

元稹初爲荆南士曹爲監軍崔潭峻所禮居無何召入翰林爲中書舍人承旨學士中人以潭峻之故爭與稹交而知樞密魏宏簡尤與稹相善穆宗愈深知重河東

節度使裴度三上疏言稹與宏簡爲刎頸之交謀亂朝

政言甚激訐穆宗顧中外人情乃罷稹內職

冊府元龜

伏覩詔書捨惟恭死罪俾永爲黔首於汴州翺九月時
上宰相書言政刑中有詞曰親戚懷二殺之可也況懷
二且非親戚哉當是時惟恭在其位故不直書而微其
詞然則惟恭之罪聞知於四方其孔甚已

賀行軍陸大夫書

李文公集

楊元卿元和中自淮西背逆歸順闔門被屠其子延宗
曾任磁州刺史開成中與河陽軍人謀逐帥以立爲其

黨所告寘于極典勅曰特寬今日覆族之刑以答當時

毀家之效斃於枯木非謂無恩

南部新書

李渤穆宗時爲考功員外郎長慶元年五月貶爲虔州刺史渤既請書宰相下考時論不一而識者以宰輔官不上疏陳列而越職釣奇非盡事君之道者也至是杜元穎等奏曰渤賣直沽名動多狂躁聖恩含貸且使守官而干進多端外交方鎮遠求奏請不能自安久留在朝轉恐生事遂出之

冊府元龜

宗廟之禮嚴肅居先薦告之詞精審爲切方將昇祔安

可九室皆同既已祧遷豈宜四昭咸在宗正少卿李子
鴻實司祠事誤進祝文罪有根源理難降減宜停見任
其後禮合變文事宜中節者太常博士不得更稱舊制
致有差殊

穆宗責降宗正少卿李子鴻等勅

武昌軍節度使苗

名與庭裕家諱同

責從子嚴不避馬擒至幕

笞其背嚴母詣闕稱冤苗貶江州司馬制曰避馬雖乖

於嚴敬鞭人合顧於簪纓舍人楊紹復之詞也苗自此

爲清議所薄

東觀奏記

藍田尉直宏文館柳珪擢爲右拾遺宏文館直學士給

事中蕭倣鄭裔綽駁還曰陛下高懸爵位本待賢良既命澆浮恐非懲勸珪家居不稟於義方奉國豈盡於忠節刑部尙書柳仲郢詣東上閣門進表稱子珪才器庸劣不合塵玷諫垣若誣以不孝卽冤屈爲甚太子少師柳公權又訟侵毀之枉上令免珪官且在家修省貞元元和己來士林家禮法嚴整以韓臯柳公綽柳仲郢爲稱首一旦子孫不孝簪組嘆息

東觀
奏記

勅鄉貢進士溫庭筠早隨計吏夙著雄名徒負不羈之才罕有適時之用放騷人於湘浦移賈誼於長沙尙有

前席之期未爽抽豪之思可隨州隋縣尉舍人裴坦之
詞也庭筠字飛卿彥博之裔孫也詞賦詩篇冠絕一時
與李商隱齊名時號溫李連舉進士竟不中第至是謫
爲九品吏進士紀唐夫嘆庭筠之冤贈之詩云云人多
諷誦上明主也而庭筠反以才廢制中首引騷人長沙
之事君子譏之

東觀
奏記

開成中溫庭筠才名籍甚然罕拘細行以文爲貨識者
鄙之無何執政間復有惡奏庭筠攪擾場屋黜隨州縣
尉時中書舍人裴坦當制忸怩含毫久之時有老吏在

側因訊之升黜對曰舍人合爲責辭何者入策進士與望州長馬一齊資坦釋然故有澤畔長沙之比

撫言

鴻輝

謹案舊書溫庭筠傳楊收怒之貶方城尉

唐以進士爲重入仕爲輕細素雜記及禹錫嘉話載賈島事一謂累舉不第文宗時坐飛謗貶長江簿一謂島爲僧居法乾寺宣宗微行於案上取詩卷覽之島攘臂奪去帝慙而遂除島長江簿唐宋遺史所載畧同程錡有奪卷忤宣宗之句撫言載開成中溫庭筠以文爲貨執政惡其攪擾場屋黜隨州方城尉裴坦爲責詞有澤

畔長沙之比北夢瑣言載制辭孔門以德行為先文章
爲末徒負不羈之才罕有適時之用夫士子起布衣爲
簿尉今爲異恩矣時則爲貶黜何唐士之貴且重也盧
氏雜說云文宗言進士之盛時宰對舉場中云鄉貢進
士不博上州刺史此實錄也

鼠璞

遣司封員外郎充史館修撰權審於衢路突尙書左僕
射平章事崔鉉判曰宰相之統庶僚僕射之臨郎吏豈
有導騎已過按轡橫街權審久在班行合諳典故便知
素履且舉舊條送都省罰七直審以素履之言難誣不

就尋左遷宿州刺史自爾不獲立朝矣

東觀
奏記

廣州節度使紇干眾以貪猥聞貶慶王府長史分司東
都制曰鍾陵問俗澄清之化靡聞南海撫封貪黷之聲
何甚而又交通詭遇溝壑無厭蹟固異於澹臺道殊乖
於吳隱舍人韓琮之詞也書上一朝不見用矣工部尙
書楊漢公前任荆南節度使以不廉聞公議益喧左遷
祕書監制曰考三載之績爾最無聞致多士之朝人言
未息旣起風波之論難安喉舌之司舍人沈詢詞也

東觀

奏
記

光啟元年七月常濬上疏論田令孜之黨坐貶死實錄
不言令孜黨爲誰按蕭邁等請誅令孜表云韋昭度無
致君許國之心多醜正比頑之迹令孜黨蓋謂昭度也
續實運錄曰七月二日表入上覽之不悅顧謂侍臣曰
藩鎮若見此表深爲忿恨自此猜間其何可堪至二十
八日敕貶濬爲萬州司戶疑三日脫誤當爲二十三日

今從實錄

通鑑
考異

宰相豆盧革貶辰州刺史韋說貶涪州刺史仍令所在
馳驛發遣爲諫議大夫蕭希甫疏奏故也制畧曰革則

縱田客以殺人說則侵鄰家而奪井選元亨之上第改
王參之本名或主掌三司委元隨之務局或陶鎔百里
愛長吏之桑田咸屈塞於平人互阿私於愛子任官匪
當黷貨無厭謀人之國若斯致主之方安在旣迷理亂
又昧卷舒而府司案牘爰來諫署奏章疊至備彰醜迹
深汙明庭是宜約以三章投之四裔其河南府文案及
蕭希甫論疏並宜宣示百僚庚辰賜蕭希甫衣段二十
匹銀器五十兩賞疏革說之罪也

舊五代史
唐明宗紀

益國利民方爲良策越常生事則亂
彞章李雲粗讀儒

書曾居假官所進條件既廣徵引仍繁而於職畧之間
荒唐尤甚且鄉閭之內苦樂不無則可沿古制而檢繩
度物宜而均濟豈得請行峻法大撓羣情詳暴斂之品
題無稍通之氣味況五兵乍息兆庶小康忽有此陳未
測何意便合勘窮疎率申舉科條尙緣言路方開政刑
務恤特從寬宥俾自省循

後唐明宗李雲
獻時務策勅

天福中命權使於契丹權以前世累爲將相未嘗有奉
使而稱陪臣者謂人曰我雖不才年已耄矣豈能遠使
於契丹乎違詔得罪亦所甘心由是停任先是宰相馮

道使於契丹纔回權亦自鳳翔冊禮使回故責詞畧曰
若以道路迢遙卽鸞閣之臺臣亦往若以筋骸衰減卽
鳳翔之冊使纔回旣黷憲章須從殿黜云其實權不欲
臣事契丹故堅辭之非避事以違命也

舊五代史
王權傳

鴻臚

謹案通鑑攷異引周世宗實錄馮道傳云契丹
遣使加徽號於晉祖晉亦獻徽號於契丹始命兵部
尙書王權銜其命權辭以老病晉祖謂馮道曰此行
非卿不可道無難色據此傳則馮道自契丹使回始
命王權奉使道亦未嘗再使契丹也與周實錄異

中書舍人劉濤責授少府少監分司西京坐遣男頊代
草制詞也監察御史劉頊責授復州司戶坐代父草制
也

舊五代史
周太祖紀

劉頊爲監察御史廣順元年七月勅頊名昇通籍官列
憲司凡繫所爲尤宜知禁不能爲子諍父而乃離局侵
官宜謫掾於方州俾省愆於終日頊父濤爲中書舍人
令頊代直草辭責授少府少監分司西京故頊責授復
州司戶參軍

冊府元龜

張格字承之故宰相濬之子也濬爲梁祖所忌格所生

母當潛之遇害潛於民間落髮爲尼流浪於函洛王建
聞之潛使人迎之入蜀賜紫加號慈福大師及建卒蜀
人以格爲山陵使格有難色未幾得罪出爲茂州刺史
僞制責詞云送往辭命不忠也喪母匿喪非孝也

舊五代史

張格傳

會鍾謨使還挾周以爲已重所言率見聽而謨本善李
德明欲爲報仇屢陳齊邱乘國危殆竊懷非望且黨與
眾謀不可測元宗遂命殷宗義草詔曰惡莫甚於無君
罪莫深於賣國放歸九華山而不奪其官爵

陸游南唐書

全唐文紀事卷十八終

全唐文紀事

卷十八

士

全唐文紀事卷十九

原任翰林院編修

國史館纂修

實錄館提調

武英殿協修陳鴻墀纂

頌揚一

唐高祖武德八年四月赤雀巢於殿門宴五品以上上

頌者十餘人極歡而罷

冊府元龜

太宗貞觀二年九月詔曰自昔帝王受天明命其有二儀感德百靈效祉莫不君臣動色歌頌相趨朕恭膺大寶情深夕惕每見表奏符瑞慙慙增懷且安危在乎人事吉凶係於政術若時主肆虐嘉貺未能成其美如治

道休明咎徵不能致其惡以此而言未爲可請自今以
後麟鳳龜龍大瑞之類依舊表奏自外諸瑞應奏者惟
顯瑞物色目及出現處更不得苟陳虛飾徒事浮詞

冊府元龜

太宗貞觀三年正月親祭先農躬御耒耜藉於千畝之
甸初晉氏南遷後魏來自雲朔中原分裂又雜以獯戎
代歷周隋此禮久廢而今始行之觀者莫不躍駭於是
祕書郎岑文本獻藉田頌以美之

冊府元龜

鴻墀謹案後魏後周並耕藉田與此所載有異

岑文本爲祕書郎直祕書省太宗行藉田之禮文本上藉田頌及元日臨軒宴百僚文本復上三元頌其辭甚

美

冊府元龜

謝偃玉牒真紀云披丹霄而軒鵬翼架元海而截鯨鱗俯拔嵩華仰迴星漢流雕矢於日谷橫文劍於天外航海極琛梯山窮貝宿雪收芒朝雲解陣階賁晦落庭軼

晨鮮

玉海

文皇帝除亂致治功德儘可形容使班馬秉此筆必甚奇偉斯作稍似不稱然沙場罄躬斗極咸羈狼山入囿

潮渚歸池東旌若木西旆條支龍鄉委賁鳥服來儀亦

佳語也今人恐不能道

蔡端明書唐太宗冊文

後村題跋

周杜良作唐太宗畫像贊云仁爐義鞫道薪德火

清異錄

臣敬宗行成季輔等啟昨晚內坊丞王君德奉宣令賚臣等玉華山宮銘賦二本拜承恩貺駭抃交懷跪玩清辭江河溢目伏惟殿下天資學府道貫生知絢發詞林若春華之麗韶景漪清碧海譬秋水之澹晨霞仙鶴和吟慙八音於雅韻神龍縹彩謝五色於雕文綺布天庭雲生石砌理含貞邃雅達谷處之端極趣幽閑妙盡崑

居之體烟松合翠露桂芬紅察彼殊形翻然共色究寫
真之奧旨擅體物之窮神若乃漢月鈎空乍臨珠箔石
苔垂髮式映莊帷莫不理超辭表意生文外自餘清拔
觸類奇新成若神化之工光乎性道之製蓋由基天挺
裕纂聖凝離故能邁古超前納卿雲於度內逾儔絕侶
括啟誦於胸中臣等忝荷殊私曲蒙垂示見所未見情
百恒品無任鳬藻之懷謹上啟陳謝謹啟

許敬宗謝皇太子玉華山

宮銘
賦啟

文苑英華

王勃字子安六歲善屬文未弱冠應幽素舉及第乾封

全唐文紀事

卷十九

三

初詣闕上宸遊東岳頌時東都初造乾元殿勃又上乾

元殿頌

冊府元龜

劉允濟爲左史兼直宏文館垂拱四年明堂初成允濟

上明堂賦天后甚嘉歎之手製褒美

冊府元龜

員半千爲右衛長史顯福門待制則天封中岳半千撰

封禪四壇碑十二首

冊府元龜

臣聞禮之興也始諸飲食故先王之制曰舉九鼎蓋芍
藥瀉熬滂瀹膏餌御九州之美順四時之和臣所以征
繕北金敢貢新鼎夫有器必有銘臣竊見九州攸同迺

述九號夫永昌天中所以基皇周也長安及岐所以紀
靈瑞也武興建都所以光帝開也日觀云亭所以美升
中也少陽載青所以冀儲德也東原底平所以廣封植
也江都淮海所以肆朝宗也江陵作鎮所以制荆蠻也
成都輿區所以遏珍貢也夫此九者誠不足掄衍鴻休
昭振方統庶覩者美其所稱知有由作微臣朽老不達
有慚歌頌塵八命之寵章負中軍之重任匪躬厥獻伏
表汗流其九鼎銘謹敢列上謹遣某官奉表以聞

吳少微爲

并州長史張仁
直進九鼎銘表

文苑英華

崔融賀嘉麥表纖芒濯露香稼搖風降之自天何必來
牟之詠嘗之於廟先符孟夏之時一穗兩歧徒說張君
之詠十畝千石方輕汜氏之書

玉海

臣某等聞行至公者莫先於發揮茂實垂不朽者不若
於刊紀鴻名伏惟應天神聖皇帝陛下德披圖五精
乘運先天地而利用依鬼神以制法無思不服有感必
通曰者變起心膺禍生肘腋弄兵指闕敢忘下濟之恩
犯門斬關遂激上靈之憤陛下近幸元武傍顧紫微鳳
翔而梟獍失圖龍見而鯨鯢就戮順天翊聖皇后配乾

積德從帝居尊佐莫大之英猷參非常之妙畧親紆寶
思式頒元猷椒掖之文久垂河漢甘泉之石已入京都
伏惟陛下卑奉聖躬謙保神器惜其國用念彼人艱有
命且停含靈失望臣等容光壽域竊位明朝不蠶而衣
無裨塵露不耕而食有負靈祇陛下寢有道之豐碑臣
等享無功之厚載亭育雖廣何所自容且天惠不可以
闕書神功不可以久寂臣等請各減所俸以勒殊休庶
同子來成之匪日無任光開垂裕之至

宋之問爲文武百寮等請造神

武頌
碑表

臣某言支使某官奏事迴伏奉某月日手詔賜臣以皇太子所寫聖製麟德殿宴百僚詩序日月揚光風雲動色捧受之次震駭失常臣某中謝臣伏以經天緯地者聖人之文多才多藝者元良之美逖聽前修旋觀往冊考論盛德罕見全能故漢后詠歌有乖雅頌之旨周儲聰哲不聞翰墨之妙伏惟陛下道洽帝堯文超繫表體陰陽之變化與雲漢而昭回皇太子德邁生知學資聖訓掩鍾張之筆札並虬鸞以飛動臣特承湛恩荷此殊錫集榮光於外府啟重寶於私庭班氏賜書旣甚懸隔

馬卿視草曾未比擬又臣所獻奉和詩事等賡歌情同
率舞濫吹之音謬塵於天聽踰涯之賞忽降於絲言豈
臣微力所宜負戴非臣捐軀所能效益無任榮荷感惕
之至

王維代陳司徒謝勅賜
麟德殿宴百僚詩序表

王右丞集

至若登太行留上黨頌功業建都畿休兵太原爲農
上並國之典禮朕奉行之何足稱者而羣臣固請紀頌
衆心難違卿藻思菁華揚過其實自視虛缺爲媿尤多

元宗答張說進上
黨舊宮述聖頌制

唐六典記南內龍池程泰之雍錄謂詔辭皆出李林甫

而非張九齡所得知也愚按九齡集有龍池聖德頌則
夸詡符瑞雖賢者不免

因學
紀聞

皇帝初臨潞州景龍元年四月二十有七日其日日抱
戴皇帝臨潞州景龍元年七月十有四日夜月重輪皇
帝臨潞州景龍二年四月二十五日廳事據案假寐百
姓白鶴觀道士宋大辯等三十餘人同見赤龍在案皇
帝景龍二年二月二十有八日巡屬縣至潞河有鹿奔
走渡河水深三丈帝馳鞭逐鹿水不及馬羈應時獲鹿
司戶參軍崔弼隨帝而涉纔入數步馬溺焉皇帝臨潞

州景龍二年八月二十有五曰長子縣界內有嘉禾合穗皇帝臨潞州景龍二年九月五日黃龍見於州城東五里伏牛山南岡遲留久之觀者如堵皇帝臨潞州景龍二年九月已後嘗有童謠云羊頭山北作朝堂其州南六十里有羊頭山皇帝臨潞州襄垣縣北有仙洞忽然自開十數里仙乳靈液凝膏注玉上黨記禹治水而登此山因名焉魏書云望氣者言其山有天子氣故太武壘石爲三封欲以厭之上黨記後魏太和末孝文帝自代幸洛見此山有伏龍疑而不進遂斷山東麓以厭

之其斷處猶存因名疑山皇帝景龍三年三月巡屬縣至襄垣南漳水上有赤鯉魚騰躍皇帝臨潞州景龍三年六月十五日黃龍再見於伏牛山皇帝臨潞州景龍三年九月九日與羣臣壺口山界坐其時東北有紫雲翩翩而來光彩照日明日上黨縣丞王敬賓等白刺史劉懷一并啟皇帝請上狀奉教不許皇帝臨潞州延唐寺有李樹連理皇帝親如驗見今御書額焉皇帝臨潞州景龍三年九月十有五曰召百姓韓擬禮著筮卦未成而一蓍翹立擬禮曰此天人之瑞洎帝踐祚授擬禮

遊擊將軍長上折衝金橋在潞南二里常有童謠云聖人執節度金橋皇帝景龍三年十月二十有五由此橋朝京師皇帝臨潞州景龍三年十月二十有五還京後州內所居寢堂上有紫氣七日不散皇帝從臨潞州還京後其它內及州街並有大人跡長二尺五寸自東而西布武相繼皇帝唐隆元年六月二十日夜除妖孽後其明日州佐吏索崇嗣於州南門外聞空中有人云臨淄王誅韋氏相王得天下其崇嗣告長史裴思裴思以妖惑罪之禁錮累日逢其月二十一日赦到獲免

案牘猶存

張說皇帝在潞州祥瑞
頌十九首序奉勅撰

張燕公集

惟開元十有一祀正月皇帝展義於河東挾右太行留
宴上黨整兵耀武入於太原設都建頌以崇王業南轅
汾睢祈穀后土天清日朗神歆如答三月庚午飲至長
安六軍解嚴四方和會邇觀法象遐詠德澤大虞巡之
典修美漢祠之禮舉人心翕而一變神物效而無方於
是邠王臣守禮甯王臣憲申王臣撫岐王臣範薛王臣
業獻書於內開府儀同三司臣璟尚書臣駿臣象先臣
頌御史大夫臣灌抗疏於外僉曰陛下受天厯數稽聖

典謨道貫三靈仁育萬類掃陰沴而覩日開闢之功也
尊文考而御天帝王之孝也天以陛下爲子人奉陛下
爲君萬殊之福斯應畢臻三代之風頌聲咸作今潞人
懷代邸詠泗亭採聖崖延元石將表潛龍之館勒啟聖
之圖勤亦至矣陛下推而不報其何以下塞衆望上對
神庥哉臣聞天之所啟人之所戴必憑睿聖元懿之德
元命貞符之紀功業見乎變德施加乎時德厚者施溥
功元者應速或階晦以彰或由難而昌蓋生其德之謂
天授其時之謂命天有成命其可沒乎陛下昔居是州

也紫雲在天神光照室白鹿來擾黃龍上昇隴出仙洞
而神魚躍山開禪穴而靈鐘韻謠言合讖巨迹引途嘉
李傍連神蓍自起當此時也金石豫變獄訟先歸政殷
六府人重五教陶無窳器漁有讓泉神而化之人不知
力昔龍負圖而大舜登狼銜鉤而后殷昌元圭錫於夏
禹赤伏歸於漢光應運協符希代稱寶未有窮祥極瑞
倬儻褒異如今之至者矣若元貺集而不彰則神心不
悅鴻業成而不贊則祝告無聞是掩天庥而蓋聖德也
臣子之罪將何解焉願聽潞人以揚丕烈帝曰往者中

宗違代國步維艱天祚我唐大命集於睿宗大聖真皇帝朕畏天將命不敢怠違其乾符坤珍皆先聖之餘福朕何力之有焉然重違昆弟公卿之請抑心敬從無爲虛美重朕不德也羣臣游聖蕩莫能名約乎舊史敢頌成績

張說上黨舊宮述聖頌序

張燕公集

鴻臚

謹案宋陶岳五代史補載周世宗在民間嘗從

江陵王處士卜方布卦忽有一蓍躍出卓然而立卜者大驚曰吾家筮法十餘世矣常記曾祖以來遺言凡卜筮而蓍自躍而出者其人貴不可言況又卓立

不倒得非爲天下之主乎遽起再拜與此文神著頌
所紀一著翹立之瑞先後同符

繼天者君也戴天者臣也下之事上作股肱耳目上之
任下敷心腹腎腸甚矣哉君之難臣之不易也今聖上
高九皇之道賢臣合一德之義風雲元感魚水冥符作
樂崇德於是乎在詩有六義請賦歌之

潘炎君臣相
遇樂賦序

文苑英華

帝在上黨延唐寺有李樹連理上親視焉

潘炎李樹
連理賦序

文苑英華

景龍元年四月二十四日皇帝初臨上黨日抱戴皇天

告符微臣頌之蓋古詩之流也

潘炎日抱戴賦序

抱戴之秋八月十有四日夜月重輪瑞之大者天意若

曰將俾吾君姊事之

潘炎月重輪賦序

景龍二年夏四月十七日帝在廳事假寢白鶴觀道士

宋大辯等三十人同見赤龍據按至矣哉神妙無方不

可得而稱也

潘炎赤龍據按賦序

景龍二年秋八月屬縣長子有嘉禾合穗瑞不虛月侯

其禕而

潘炎嘉禾合穗賦序

景龍二年八月帝逐鹿於潞河惟河也深三丈濶倍之

鹿迫而入水因鞭而逐之水不及韉應弦獲鹿後騎入

者溺焉

潘炎潞河逐鹿賦序

景龍二年九月後常有童謠云羊頭山作朝堂郡南六

十里有羊頭山今興唐宮卽當之矣

潘炎童謠賦序

景龍二年秋九月五日黃龍見於上黨伏牛山之南岡

遲留久之表彰聖人之德也

潘炎黃龍見賦序

景龍三年春二月帝巡屬縣至於襄垣漳水有赤鯉躍

聖帝之瑞也

潘炎漳河赤鯉賦序

景龍三年六月十五日黃龍再見於牛山天意汲汲於

聖人

潘炎黃龍
再見賦序

景龍三年九月九日帝與羣官壺口山升高時有紫氣

光彩照日

潘炎九日
紫氣賦序

景龍三年九月十七日上使韓從禮著筮卦未成著白

立從禮曰大人之瑞也

潘炎神著
立賦序

金橋在上黨南二里常有童謠云聖人執節渡金橋景

龍三年十月二十五日帝經此橋之京師

潘炎金
橋賦序

景龍三年十月二十五日帝還京後州內所居寢室堂

上有紫氣七日不散

潘炎寢堂
紫氣賦序

並文苑英華

奉閏四月二十一日敕中書門下奏請宣示中外者歷
觀寶牒曾所未聞側捧瑤緘不勝忭躍臣謹按洛下閎
太初歷云後八百年歷差一日有聖人正之至陛下定
歷之年正當八百今又元元皇帝以聖明之代來見真
容於夢寐之間再陳靈應稱陛下慶流萬葉享祚無窮
則知聖歷昌期合符同契者久矣雖縑緗已載而茗琬
未書將何以對越神休光昭睿德臣之愚昧敢以上聞
伏請於開元觀具寫綸言勒於貞石入仙宮而物覩知

聖祚之天長如允臣所請諸州亦望准此

李德裕請刻夢真容敕旨

奏

上敦睦九族於諸侯王尤盡友愛卽位後於十六宅起
雍和殿每月三兩幸與諸侯王擊鞠合樂錫賚有差進
土司馬樞爲雍和殿賦詞雖不典亦志一時之事實

東觀

奏記

熊延景爲岐王文學有五色鸚鵡能言育於宮中元宗
令左右試牽御衣鳥輒噉曰叱咤延景因獻鸚鵡篇以
贊其事帝以鳥及延景詩示百寮尙書左丞相張說上

表賀曰伏見天恩以靈異鸚鵡及熊延景所述篇出示朝列臣按南海異物志有時樂鳥鳴皆曰太平天下有道則見臣驗其圖丹首紅臆朱冠綠翼與此鸚鵡無異而心聰性辯護主報恩故非常品凡禽寶瑞經所謂時樂鳥也延景雖敘其事未正其名望編國史以彰聖瑞許之

酉陽雜俎

原夫天作太華氣雄羣山秉靈伊何受命如響自坤元之所開拓虞帝之所巡遊祀典雖存宏圖蓋闕洞陰陽之不測其惟大聖歟於是藻翰自天發揮神化建碑於

廟以光寵焉乃命朝英實司其事經始勿亟庶人子來
徒觀其神輸坤珍美石次玉追琢之際厥聲泠然磨礱
之後其光洞納樹之平地疑若斷山六龍盤薄糾其上
羣神羅立負其下藝事既畢宸章乃開竊以洪鑪大造
之時天動地業祕籙聿來之曰風搖雲起詞義至廣含
元氣而運行翰墨至精吐奎星而飛動剛柔相錯神妙
無方合而五光昭離而萬象列宇宙之間粲如也由是
發巖巒之氣色益祠廟之風稜不怒而威有來加敬益
因大君之一顧也寵秩榮幸不其至哉頌聲未作詞客

之過小人固陋遊聖難名實賴文宗繼其不逮敢託呂

補闕向爲之頌云

達奚珣華山
述聖頌序

臣頌言臣學不淵博詞益實滯陛下過聽被恩最久喜
規封岱增天帝王壯觀臣以宗伯秩禮陪清道之輿臣
之幸一也又伏觀自天垂象銘岳昭訓臣以有司上載
封禪之烈臣之幸二也臣再三之幸萬百常情臣某中
謝臣東京奉旨竊聞刻石三頌臣草一敷聖主之元猷
次紀宰官之鴻筆斯事至大咎繇吉甫之難也臣自料
度不勝惶悚而議者謂臣光榮之至死且不朽臣所羸

疾翳然言罕能述忠

闕二

愚臣極思慮罄肝膽而爲之

伏希演脩德之符非敢助親文之化儻以潤色鴻業一

蒙睿覽則臣之至懇萬殞知歸輕塵冕旒若眞冰谷無

任區區戰灼之至

進東嶽朝覲頌表

蘇頌集

右尹鳳祥宣聖旨示臣等皇太子所製王尊師碑文並

壽王書臣等伏以天姿自高更深聖訓文藝英拔理絕

人境臣等周章省覽欣忭載懷兼皇太子文義高深壽

王毫翰灑落朝臣不見竊懼蔽善臣等專輒宜留碑本

望明日將示百官了訖續進不勝忭躍之至

張九齡賀皇太子製

碑狀
曲江集

碑在華陰縣岳廟中達奚珣撰序呂向撰頌并書不著
年月攷呂向開元中召入翰林此碑稱集賢殿直學士
當是開元中立碑云藻翰自天發揮神化建碑於廟以
光寵焉又云樹之平地疑若斷山六龍盤薄紮其上羣
神離立負其下當是頌元宗所建華岳碑也

唐述聖
頌碑

石墨鐫華

開元二十一年二月衢州獲魚有銘侍中裴光廷等奏
賀曰魚龍爲圖河洛所出比之盛時彼何足云張九齡

賀瑞魚銘曰魚爲龍象旣彰受命之元銘作人文更表

錫年之永

玉海

白以爲賦者古詩之流辭欲壯麗義歸博達不然何以
光贊盛美感天動神而相如子雲競誇詞賦歷代以爲
文雄莫敢詆訐臣請語其大畧竊或徧其用心子虛所
言楚國不過千里夢澤居其大半而齊徒吞若八九三
農及禽獸無息肩之地非諸侯禁淫述職之義也上林
云左蒼梧右西極考其實地周袤纔經數百長揚夸胡
設網爲周陟放麋鹿其中以搏攫充樂翫獵於靈臺之

園圍經百里而開殿門當時以爲窮壯極麗迄今觀之
何齷齪之甚也但王者以四海爲家萬姓爲子則天下
之山林禽獸豈與衆庶異之而臣以爲不能以大道匡
君示物周博平文論範圍之小竊爲微臣之不取也今
聖朝園池遐荒殫窮六合以孟冬十月大獵於秦亦將
耀威講武掃天蕩野豈淫荒侈靡非三驅之意邪臣白

作頌折衷厥美

大獵賦序

李太白集

臣甫言臣本杜陵諸生年過四十經術淺陋進無補於
明時退常困於衣食蓋長安一匹夫耳頃歲國家有事

於郊廟幸得奏賦待制於集賢委學官試文章再降恩
澤仍猥以臣名實相副送隸有司參列選序然臣之本
分甘棄置永休望不及此豈意頭白之後竟以短篇隻
字遂曾聞徹宸極一動人主是臣無負於少小多病貧
窮好學者已在臣光榮雖死萬足至於仕進非敢望也
日夜憂迫復未知何以上答聖慈明臣子之効況臣常
有肺氣之疾恐忽復先草露塗糞土而所懷冥冥孤負
皇恩敢攄竭憤懣領畧不則作封西嶽賦一首以勸所
覬明主覽而留意焉先是御製西嶽碑文之卒章曰待

余安人治國然後徐思其事此蓋陛下之至謙也今茲
人安是已今茲國富是已況符瑞翕集福應交至何翠
華之脈脈乎維嶽固陛下本命以永嗣業維嶽授陛下
元弼克生司空斯又不可以寢已伏惟天子霈然留意
焉春將披圖視典冬乃展采錯事日尚浩濶人匪勞止
庶可試哉微臣不任區區懇到之極謹詣延恩匭獻納
奉表進賦以聞臣甫誠惶誠恐頓首頓首謹言

進封西
嶽賦表

杜詩詳註

臣甫言臣生長陛下淳樸之俗行四十載矣與麋鹿同

羣而處浪跡於陛下豐草長林實自弱冠之年矣豈九州牧伯不歲貢豪俊於外豈陛下明詔不仄席思賢於中哉臣之愚頑靜無所取以此知分沈埋盛時不敢依違不敢激訐默以漁樵之樂自遣而已頃者賣藥都市寄食朋友竊慕堯翁擊壤之謳適遇國家郊廟之禮不覺手足蹈舞形於篇章漱吮甘液游泳和氣聲韻浸廣卷軸斯存抑亦古詩之流希乎述者之意然詞理野質終不足以拂天聽之崇高配史籍以永久恐倏先狗馬遺恨九原謹稽首投延恩匭獻納上表進明主朝獻太

清宮朝享太廟有事於南郊等三賦以聞臣甫誠惶誠

恐頓首頓首謹言

進三大禮賦表

杜詩詳註

全唐文紀事卷十九終

全唐文紀事卷二十

原任翰林院編修 國史館纂修 實錄館提調 武英殿協修陳鴻墀纂

頌揚二

天寶元年吐蕃攻逼定戎城皇甫惟明奏破賊旣掃妖
氛兼有慶雲見宰相賀云合戰之時返風破敵決勝之
後卿雲藹空

玉海

天寶八載方士李暉上言見太白老人告玉版祕記事
因是羣臣上帝號于邵有玉版元記頌

玉海

天寶九年正月文武百寮禮部尙書崔翹等累上表請

封西嶽刻石紀榮號帝固拒不許翹等又奉表懇請曰
自今月辛亥至於癸丑累表誠祈請紀榮號聖心恭默
沖讓再三臣等伏讀綸言退增祇慄敢重慙愚懇期諸
必遂云云帝手詔不許曰輕修大典所不願爲時或傳
中旨請紀榮號何如空言請封西嶽乙卯羣臣又奉表
請封西嶽曰伏奉癸丑詔書曰輕修大典所不願爲臣
等戰慄匪遑甯處實以陛下功成道洽理實升中且夫
龜龍咸格天意也夷夏大同人事也時和年豐太平也
無爲清淨至理也允應大典豈謂輕修乎奉若靈命安

可不爲乎宗子又上表曰陛下頃歲建碑曰嘗勤報德之願未暇崇封之禮萬姓瞻予言可復也臣以爲天地之主豈徒言哉神祇厚望故已久矣伏惟俯順百辟兆人之請明徵刻石銘山之記暫遷萬乘降被三峯奠珪璧於中壇奏笙鏞於上帝使普天蒙福重賜無疆頻冒宸嚴並期必遂無任懇切屏營之至謹詣朝堂奉表陳情以聞凡三上表上乃許之

冊府元龜

鴻輝

謹案舊書元宗紀以華岳廟災關內旱乃停封

天寶十載元宗訪召入內獻明堂九鼎議應制作皇唐

聖祚文多講道談經

郭侯外傳

太平廣記

甘子天寶十年上謂宰臣曰近日於宮內種甘子數株
今秋結實一百五十顆與江南蜀道所進不異宰臣賀
表曰雨露所均混天區而齊被草木有性憑地氣而潛
通故得資江外之珍果爲禁中之華實

酉陽雜俎

天寶十四載安祿山陷洛陽明年陷長安天子幸蜀太
子卽位於靈武明年皇帝移軍鳳翔其年復兩京上皇
還京師於戲前代帝王有盛德大業者必見於歌頌若
今歌頌大業刻之金石非老於文學其誰宜爲

大唐中興頌序

次山集

唐興百三十有八載皇帝在宥天下鑄五兵爲農器栖
萬姓於壽域道證德洽神人以和春正月冢臣上將卿
士庶尹洎三老五更公侯伯子男相與揭厲皇猷請增
明號上撝謙而未許也僉曰陛下孝達神明道超先帝
以德則符廣運以時則復大樸以功則保定丕業格於
上下而尊稱猶淺鴻名未光億兆之心何戴神祇之望
何塞天子南嚮而讓者九不得已而僉之然後屏椒房
而徹黃屋徜徉乎大庭氏之館洎兮凝神恍兮存真想

洪崖廣成之倫披霓裳而下鳳闕蹕蹕左右上千萬壽
凡遭逢昌運沐浴聖涯而不能頌烝人賦江漢吉甫仍

叔之罪也臣敢有二事

慶鴻名 毘陵集
頌序

獨孤及賀潞州芝草嘉禾表庶政方父二瑞薦臻唐叔
之獻齋房之歌古今同契

玉海

郭子儀奏瑞禾云天啟興王瑞先百穀故漢稱雨粟周

頌來牟

玉海

謹案符瑞圖云宗廟肅敬則烏至昔范賢對蜀主言慈
烏知孝誠養之禽必有遠方懷而至者陛下聖策遠備

威震遐戎畧地攻城無歲不克巴蜀之外今斯獲醜慈
烏效祉可謂有徵加以遠降日輪近巢天宇據北辰以
永固豈南風以遠枝自古攸傳無聞此瑞願陳不朽垂
裕將來謹獻孝烏旌德頌七首雖論揚之美有愧於清
風而葵藿之心無忘於捧日謹投延恩匭奉表以聞

楊譚

進孝烏
頌表

代宗十月十三日誕辰有慶雲見常袞賀表曰十月良
月遠騰盈數之期後天奉天近和下元之厯從風蕭索
抱日縈迴色涵流渚之虹影雜繞樞之電

玉海

孟冬十月旬有三日我皇帝降誕之辰也百靈會祉萬
方集慶於是檢校刑部尙書左翊林大將軍紀國公臣
高昇與一二軍吏稽首言曰竊稽首竇冥蹟乎至精道
本無二聖惟歸一超於物則拯拔羣迷現於時則亭育
衆品電繞之與夜明也豈其俶歟惟聖表聖唐哉皇哉
請以真如之像延景洪福粹容留霍神變燭耀四天周
迴八部圍遶信足以上旌至德下撫至誠臣哉鄰哉

于邵

觀世音
像贊序

皇唐八葉之中興提天綱披寶圖臨八紘俯萬物垂鴻

諸休粵十有七年元冬陽月旬外三日天子居北堂左
个受厥初之慶自予弼臣百官丞令咸歸休澣則歌康
衢樂壽域者具百姓之歡心有司諫掌綸之臣當右掖
分宵之直望闔闔沐薰風齋心以虔稽首獻頌

于邵登
誕頌序

大厯十二年五月甲子成都人郭遠獲瑞木一莖有文
曰天下太平四字獻之宰臣奏賀曰至德之化先賁草
木太平之時遂形文字望藏祕閣付史館

玉海

臣華言昔漢明帝時徵外檠木白狼獻詩歌德屬事史
官況臣自曾祖至臣備國家職員臣又逮事元肅宗今

以餘年獲事陛下官歷御史補闕尚書郎敢述列聖爲
無疆頌式昭皇家大慶無窮謹稽首以聞

李華無疆頌八首序

李遐叔文集

德宗載誕曰皇太子獻佛像德宗命執誼爲畫像贊上
令太子賜執誼縑帛以酬之

唐書韋執誼傳

興元紀號皇上宅位六祀七政貞明於上七教敷聞於
下其有不迪不吉不庭不若之徒皆欣然而和晦然而
化春三月司天氏奏歲星居心宿五度其色黃明潤大
光祥帝位積五十餘日詔下有司頒示中外故臣得而

言之以形歌頌臣謹按歲星五帝爲蒼五行爲木五常
爲仁五事爲貌天意若曰時以至仁爲理覆露萬人洽
浹生類協夫五行之用則發於星緯形於占應陰陽大
化昭報成功元符幽贊其昭昭如是禮運之論聖人曰
以日星爲紀以四時爲柄洪範之敘皇極曰斂時五福
用敷錫厥庶人發於人格於天天人交感合若符節其
年秋平河中之寇葬其遺骸復其世祀班淮右之師用
宏文告用去武備此二帝三代所以恢令名也於是一
統類以昭德明法制以塞違薦禮百神賓懷曠俗嘉瑞

美祥紛委狎至置之而不有哲人端士連茹播職求之
如已失然後端拱於穆清怡神於靜冥驅一代爲純誠
接萬靈於明庭斯又登邁邃古光昭聞見巍乎紹天統
物之盛者也微臣伏於草茅之下沐浴仁聖敢獻歲星
居心讚一章以備周詩由庚由儀之闕

歲星居
心讚序

權文

公集

文粹權德輿歲星居心頌皇上六祀春三月司天奏歲
星居心宿五度其色黃詔頒示中外頌曰敷祐四方發
爲天祥重華煌煌乃居明堂

王
海

維孟夏十四日天降皇帝之辰羣臣感覆幬之恩朝明
庭而獻萬壽者外盡四海罔有不至時臣亦幸在京師
無因緣以陪進竊自思念其感恩受賜與羣臣無異徒
以其身之卑賤至願莫伸如暗者欲言蹇者欲趨乃作
降誕日獻壽文一篇恭置於康莊之衢

侯喜德宗皇帝
降誕節獻壽文

序

張宏靖爲東都留守從事獻賦美二京之制德宗嘉其

文擢授監察御史

冊府元龜

辰象在天睿文昭煥體宏述作義著箴規發揮刑政之

源散藻皇王之道況理包繫象詞正典謨豈惟炯誠心
靈實乃化成天下伏以刑清則功濟化育政治則俗致
和平大哉聖言允叶天聽臣職守方鎮宣揚教化仰觀
睿藻伏荷時休思欲紀在盤盂周旋佩服不若懸之曰
月垂範將來是用課率柔翰形於傳寫刊於琬玉之上
表於府署之門示文武之楷模爲古今之殊觀其碑刊
刻已畢見立屋宇謹令修裝三本隨狀奉進臣藝能薄
劣筆札無功貴竭臣子之誠式揚君父之德

韋阜謝政
刑箴表

王者嘉瑞曰四靈龜其一也皇帝握圖御寓十有一年

秋七月旬有一日龜雄雌各一游於內池甲耀金毛文
滋綠彩帝乃出示百官以議其瑞僉曰至德之應也少
司成命文士賦以美焉敢布下才同夫體物

周存瑞龜
游宮沼賦

序

文苑英華

隋文帝滅陳蕩定海內煬昏多罪墜失先業身滅國替
幼恭以神人非聖莫可乃命太保蕭造奉皇帝璽綬歸
我高祖高祖固讓謠歌獄頌已歸唐矣而薛舉王充實
建德等陳勝倡禍爲漢祚階夫鹿臺之積非無財也閭
左之戍非無卒也湯以七十里文王以百里而臣諸侯

非有土也隋地徧天下二帝之業一朝埽盡可不謂大
悲乎吳公子札古之達天命者其歌唐思深哉其有陶
唐氏之遺風乎氣蒸芒碭龍躍太原天命也昔司馬相
如賦子虛諸侯之事非天子之事漢武聞之猶曰朕獨
不得與此人同時班固張衡左太沖所賦兩京三都各
務誇大而王者受命則闕而不書蓋賦者古詩之流古
者採詩言之無罪今王澤不竭斯文未喪翰墨閒作其
誰曰不然先王建國始以文經上行下效終以武定強
本弱枝四方翕然無兇人矣故明德慎罰文王所以造

周也應天順人武王所以克商也書云帝堯聰明文思
帝舜濬哲文明斷自唐虞洎乎周漢帝王美稱以文爲
首我唐文德宜在三代之上微臣賦頌恥居數子之下
初論隋氏顛覆次論皇家開統末論告厥成功簡於上
帝鋪乎下土播乎無窮固非常才淺慮之所能及意者
實以祖宗光靈引耀鼓動之所致也

高祖受命
造唐賦序

華陽

集

臣況言臣聞上古滅跡以恢至道其次立名以扶大化
臣山谷之人頃爲韓滉參謀滉性嫉惡臣性孤直滉先

朝露臣復故山陛下拔臣臣況口噤汗出不敢論天下
事然自開元天寶以來耳目所接精經茂德畧有百人
不霑一命非不欲出無益所以不出豈大國無人而黨
與之徒未詳菽麥驟居清貴此由權臣上負明主下負
蒼生中遏賢路耳是非邪正勢不兩立唐有天下賦斂
甚薄刑罰甚寬神人保和鳥獸咸若然而時有反側逋
逃之誅得無因乎惟天啟聖無有一物不得其所書曰
遠人不服來以文德德猶土也廣厚載物文猶火也光
明麗天剋金之象生土之義蓋聞朝出羣龍多士如海

出夜光明月所以別好惡而扇華夷未有影不從表聲
不從聽聖德惟新頌聲不作臣下之闕也謹進高祖受
命造唐賦一篇論皇家大慶歷祚延久悅若光靈促臣
上獻伏惟陛下赫赫巍巍與天同功鳳凰巢於阿閣麒麟
乳於郊藪臣之願也無任冰谷之怖謹奉表以聞臣
況誠惶頓首頓首謹言

上高祖受命
造唐賦表

華陽集

昔陸機袁宏爲晉人而歌功於漢魏作者猶或稱之況
乎遊聖代觀國光目睨凌煙而頌聲不作某不揣賤劣
有亶然之志輒盡所蓄各爲讚一章上以見王業之艱

難中以明聖賢之相須次以明前哲之光韻末以聳後人之盛節侯君集張亮負勲跋扈自陷大逆敢沒其名用彰天罰使伐勞懷貳者懼春秋之義異姓爲後故以

河間元王爲讚首云

凌煙閣勲
臣頌序

呂衡州集

賢二千石河南元結字次山自作道州刺史廳事記旣彰善而不黨亦指惡而不誣直舉胸臆用爲鑒戒昭昭吏師長在屋壁後之貪虐放肆以生人爲戲者獨不愧於心乎往刺史有許子良者輒移元次山記於北牖下而以其文代之後亦有時號君子之清者蒞此熟視焉

而莫之改豈是非之際如是其難乎予也魯安知其他則命圻而書之俾復其舊且爲後記以廣次山之志云

道州刺史 呂衡州集
廳後記

穆宗初韓愈圖慶雲乞付史官表曰非煙非雲抱日增麗斯爲上瑞寶應太平黃帝因之以紀事虞舜由之而

作歌

玉海

退之符離白兔書稱說功德祥應唐明宗時宿州亦獻白兔安重誨曰兔陰且狡雖白何爲却而不以聞二公

所見不同如此

猗覺寮
雜記

全唐文紀事

卷二十

士

中大夫守祕書監上柱國賜紫金魚袋臣白居易言談
論之先多陳三教讚揚演說以啟談端伏料聖心飽知
此義伏計聖聽旣聞此談臣敢畧而不言唯序慶誕贊
休明而已聖唐御區宇二百年皇帝承祖宗十四葉太
和初歲良月上旬天人合應之期元聖慶誕之日雖古
者有祥虹流月瑞電繞樞彼皆瑣微不足引喻伏惟皇
帝陛下臣妾四夷父母萬姓恭勤以修己慈儉以養人
戎夏乂安朝野無事特降明詔式會嘉辰開達四聰聞
揚三教儒臣居易學淺才微謬列禁筵猥登講座天顏

咫尺隕越於前竊以釋門義休法師明大小乘通內外
學靈山嶺岫若海津梁於大衆中能獅子吼所謂彼上
人者難爲酬對然臣稽先王典籍假陛下威靈發問旣
來敢不響答

三教論
衡序

白氏長慶集

右泰倫重晏至宣賜臣前件御劄其中聖旨云鎮州逆
亂枉害忠良若與元翼鎮州節度使卽是捨賊之門者
伏以睿筭若神聖慈猶父視兇狡之構亂義在克清念
台輔之銜寃期於必報此蓋仁深天地勇過雷霆臣實
庸愚難議窺測況臣謀猷失次罪戾是憂宸翰忽臨天

章煥發舞鳳回翔於懷袖飛龍顧盼於縑緗豈獨傳之
子孫便可鏤於肌骨微臣無任踴躍光榮之至

謝御
劄狀

元氏長慶集

柳宗元賀幽州華州嘉禾圖表六穗稱於漢臣異畝書
於周典正元二十一年七月又賀劍南成都進嘉禾圖
陝州紫芝草表獻於王庭唐叔慙同穎之異薦諸郊廟
班史謝連葉之奇既呈薿薿之祚更覩煌煌之秀

王海

臣伏見漢諸儒若班固張衡者皆賦都邑盛稱漢隆當
王道昇平火德丕赫數子歌詠發著後代今自隋室遷

都而我宅焉廣狹榮陋與漢祿狀言時則有六姓千齡
之變言地則非秦基周室之故宜乎稱漢於彼述我於
此臣幸生聖時天下休樂雖未及固衡之位敢效臯陶
奚斯庶幾之誠謹再獻兩都賦凡若干言以詘夸漢者
昭聞我十四聖之制度請付史氏

李庚兩都賦序

文苑英華

鴻臚謹案庾懿宗時人

金闕降祥紫炁接度闕之狀瑤壇祕瑞赤光騰發地之
祥粵有元符留於古篆當午夜而龍蛇搖動六字分輝
後一年而狼武蕩平八紘無事克昭靈貺獲啟中興考

帝祖之微言顯神功於景運得不標於道觀銘在蜀川
流傳千百萬年紀我一十八葉樂朋龜職司內翰首冠
近臣妙迴擲地之金鏤入他山之石鋪陳盡善蔡邕當
患於先知述作無遺子建何勞於獨步宜刊盛事以證

斯文

中和四年
中書門下

闕名奉勅立青羊宮碑牒

書曰擊石拊石百獸率舞是知時貞而物應德博則化
光故九有宅心萬方惟允我開元聖文神武皇帝陛下
懋建皇極丕承寶命揚五聖之耿光安兆民於反側功
成道備作樂崇德上以殷薦祖宗下以導達情性則有

天馬絕足來從東道出天庭而屢舞仰皇心而載悅豈止緣錯開圖分九疇於夏后汗溝走血服四夷於漢皇而已哉野人沐浴聖造與觀盛德敢述蹈舞之事而述

之

闕名舞馬賦序

文苑英華

予僑家後圃有一大井是武肅王外祖家舊物井有文曰於維此井淳育坎靈有莘有邠實此儲英時有長虹上貫青冥是惟王氣宅相先徵爰啟霸主奠妥蒼氓沛膏漸澤配德東溟臣羅隱謹頌

楓窗小牘

武肅王姓錢名鏐始誕之夕鏐父寬方他適鄰人急奔

告曰適過君家後舍聞甲馬聲甚衆寬疾馳歸而鏐已
生復有紅光滿室寬怪之將棄於水邱氏之井鏐大母
知非常人固不許因小字曰婆留而井亦以名羅隱婆
留井頌云云井故武肅王外大父所發也

十國春秋

周世宗顯德四年五月癸卯翰林學士兵部侍郎知詔

誥陶穀進紫芝白兔頌

冊府元龜

廣政四年冬十月彭山副將頭楊富獲銅印一於江岸

進上凡篆文八十字帝命嚴筭作瑞篆記

十國春秋後蜀紀

鴻輝

謹案銅印篆文詳載元費著器物譜

僧延壽字冲立年十六時文穆王鎮餘杭延壽獻齊天

賦衆咸欲官之又注心賦一卷又感遇賦一卷

十國春秋

王定保善文辭高祖常作南宮極土木之盛定保獻南

宮七奇賦以美之一時稱爲絕倫

十國春秋

鴻墀

謹案宮作於乾亨八年廣東誌云在今仙湖白

蓮池其前爲藥洲

全唐文紀事卷二十終